

## Thò Da Jacò Bàu Patô Adroi

*Hiniq wa Bàu Xèm Da Sech:*

Thò cô i bàu tiaq manoh hèm da mangai Yothaiq, wa khoi achìh jò Tagop Hadròih xam mangai yi bàc mangai Yothaiq.

*Mangai Achìh wa Hanam Achìh:*

Mangai achìh Jacò. Jacò cô oh da Chuaq Jêxu pah miq. Jò baxèm can rìh Chuaq Jêxu, Jacò ùh lùì Haq broq Mèsi - Mangai Dèch Claih. Èh haq lùì joq 'nàng hi broq craq gàu da Tagop Hadròih da Jê-ru-sa-lem.

Sech cô khoi achìh hanam 48 Atìq C., joq 'nàng adroi hanam 50 Atìq C.

*Bàu Anoi:*

Jacò achìh thò gòi ca mangai 'bìq padit padiang wa parai pariang bàc gùng. Haq loq enh parông manoh wì haq ta bìac nan xa, wa 'màng leq wì haq phai rìh tiaq Chuaq rìm tang hì. Bàu cô anoi hnài bìac manoh lùì joq 'nàng wa can rabiaq joq 'nàng.

*Rìm 'Nat:*

1. Biac 'Bàt Thù wa Biac Padô 'Nùt: 1:1-18
2. Tamàng Bàu Hnài wa Broq Tiaq: 1:19-27
3. Paq Gen Can: 2:1-13
4. Manoh Lùì wa Biac Broq: 2:14-26
5. Palùà Tàt Rapet Capoch: 3:1-12
6. Baiq Toq Can Rabiaq: 3:13-18

7. Pa'yèp Trong Lam Da Crõng Taneh: 4:1-17
8. Pa'yèp ca Mangai Padrõng Can Ma Padit padiang: 5:1-6
9. Bàu Parông: 5:7-20

### *Bàu Bòch Hmàih*

<sup>1</sup> Au Jacò, hapõng da Boc Plinh wa da Chuaq Jêxu Crich,

Gòi bàu bòch hmàih 12 hadròng hadrech khoi pac lac.

### *Con Caiq Chuaq Chiuq Xalep*

<sup>2</sup> Ôi oh daq, jò pì glàm bàc baxa thù, pì phai ngan dìq ca biac aih tiàh ca biac bùi lem beq, <sup>3</sup> ma jah 'màng aih pì loq biac baxa thù manoh lùì broq loh can dràng cajap, <sup>4</sup> wa can dràng cajap jah broq pì i manoh craq tôm gêh ùh thiùq biac lem leq. <sup>5</sup> Tàng ta oh daq i mangai leq thiùq khôn rabiàq, waiq xìn Boc Plinh beq, Haq hnhu am ùh hiàq trech, Haq hnhu am rùng rai ca rìm ngai. <sup>6</sup> Mahaq ep yõc manoh lùì waiq xìn, apaq ra'ngòt, ma jah 'màng aih mangai ma ra'ngòt, wì tiàh ca cato diac raxìq lai laq, 'bìq cayeo broq tadroq 'nong lam ta cô 'nong lam ta tau. <sup>7</sup> Mangai 'màng aih apaq xoh dađeh jah nhàn yõc cleq enh Boc Plinh, <sup>8</sup> aih mangai baiq manoh, haq ùh cajap manoh dìq ca trong dađeh.

<sup>9</sup> Oh daq leq pahamoq, catèh dèh biac Chuaq ma padèch pì beq, <sup>10</sup> wa mangai can padrõng hadai catèh hlài phàn ma hamoq da cla beq, ma jah 'màng aih mangai can padrõng jah hnhung đac tiàh ca riang nhat. <sup>11</sup> Mat mahì tõi tôq dèh, nhat croh, riang hadrùih, can lem loh ca 'mèq;

mangai can padrõng hadai jah taclah hnhung  
'màng aih ta biac cla broq.

*Padô 'Nùt wa Biac Am Dech*

<sup>12</sup> Xôq ramõt am ca mangai chiùq padô 'nùt, ma jah 'màng aih jò khoi chiùq nui biac baxa thù, èh jah nhàn yõc cadoh can rih Boc Plình khoi hùaq am ca mangai loq waq ca Haq.

<sup>13</sup> Jò 'nang 'bìq padô 'nùt, apaq doi: Aih Boc Plình padô 'nùt au, ma jah 'màng aih Boc Plình ùh padô 'nùt cabô, biac dù hadai ùh jò leq jah padô 'nùt Haq. <sup>14</sup> Mahaq tang ngai mòiq 'bìq padô 'nùt taiq biac ham enh ma parông dađeh.

<sup>15</sup> Khoi èh, manoh enh òi jiang, xa-ông loh tôiq lôì; tôiq lôì jah gêh, xa-ông loh can cachìt.

<sup>16</sup> Ôi oh daq au loq waq, apaq 'bìq padô 'nùt.

<sup>17</sup> Rìm biac am dech lem lình wa biac hnhu am gêh tòm dìq loh enh 'nhèq enh Baq 'ngah 'ngiang. Ta Haq ùh i ca biac tablòq leq, hadai ùh i ca biac ta'mroq hlài leq. <sup>18</sup> Haq tiaq manoh enh cla Haq, khoi yõc bàu da biac joq 'nàng xa-ông hlài bèn, waq ca bèn jah wìa tìah ca plì baxèm ta 'bài mangai Haq ma broq loh.

*Broq Tiaq Bàu Boc Plình*

<sup>19</sup> Ôi oh daq au loq waq, pì khòh loq biac cô: Rìm ngai ep renh tamàng, mahaq adia ca capoch, adia ca nòih, <sup>20</sup> ma jah 'màng aih can nòih da con mangai ùh broq gêh biac ta-atoq da Boc Plình enh. <sup>21</sup> 'Màng aih, cađac dõng rìm biac amùa wa rìm biac ngang dù ma òi hlài beq, paha'neq manoh nhàn yõc bàu Chuaq khoi pìt ta manoh oh daq, aih bàu jah dèch mahua yiang pì.

<sup>22</sup> Mahaq broq tiaq bàu aih beq, apaq toq tamàng dech, èh 'nùt dađeh. <sup>23</sup> Ma jah 'màng aih, tàng i mangai toq tamàng bàu mahaq ùh broq tiaq, aih tiah ca mangai ngan dèh hadrò cla ta gùang, <sup>24</sup> hnoq, hi khoi lam đac, tajòì 'mòi haq hèt haq mangai 'màng leq. <sup>25</sup> Mahaq mangai leq ngan ma ro ranenh ma khoi gêh tòm, aih ranenh da biac ùh tawac pakènh, èh haq òi broq tiaq, ùh xài tamàng khoi èh hèt, mahaq diq ca manoh broq, èh mangai aih chaq jah xôq ramõt ta biac cla haq broq.

<sup>26</sup> Tàng mangai doi dađeh tiaq Chuaq mahaq ùh pagàt dèh rapet cla, mangai aih 'nùt hlài dèh manoh cla, biac tiaq Chuaq da mangai 'màng aih 'ngwan. <sup>27</sup> Đaoq lem hreo wa hadròih jang ngìa Boc Plình Baq bèn, aih: Thia hmàih ca mangai lac wa mangai hadrô ta jò wì haq nan xa, wa wèq dađeh claih ca biac amùa da crống taneh.

## 2

### *Apaq Gen Can*

<sup>1</sup> Ôi oh daq, pì khoi lùì Chuaq Jêxu Crich 'ngah 'ngai da bèn, èh apaq gen can mangai leq. <sup>2</sup> Tàng i mòiq ngai xràng canhàng wang, caxùnh eo lem, mùt nòi tagop pì, i hòm mangai pa caxùnh cwàn eo hyah hyai hadai mùt dìq, <sup>3</sup> èh pì ngan mangai caxùnh eo lem, doi: Ha'ngui jang cô nòi yì wia, mahaq doi ca mangai pa: Yòng jang 'mat raq, loq ha'ngui jang long thòt au, <sup>4</sup> 'màng aih i joq pì khoi lah đac dabau wa yốc manoh hèm 'mèq hadrah ùh?

<sup>5</sup> Ôi oh daq au dìq jaq loq waq, tamàng cô: Boc Plình khoi ràih mangai pa ta crông taneh òoìq broq ca wì haq loh wìa padrông can ta manoh lùì wa wìa mangai hatia da Diac Plình Haq khoi hùaq am ca mangai loq waq ca Haq? <sup>6</sup> Mahaq pì khìn đac mangai pa! Pì ma ùh loq 'bài mangai can padrông loq padit padiang, khoi èh hua pì trùh nòi hadrah 'mòh? <sup>7</sup> Ma ùh xài wì capoch ha'nhèq ðùng hiniq Chuaq Jêxu pì ma iu padèch 'mòh?

<sup>8</sup> Tàng pì joq 'nàng iu wèq gêh tòm ranenh khoi jah padèch ha'nhèq, tiaq khoi achìh ta Sech Hadròih: “Pì phai loq waq ca mangai haten hatia tiah ca cla beq, aih pì khoi broq biac lem.”✧

<sup>9</sup> Mahaq tàng pì gen can wì, aih èh broq tòi, Ranenh jah ta'mòq tòi ca pì tiaq mangai broq ùh troq ca Ranenh. <sup>10</sup> Ma jah 'màng aih mangai leq wèq gêh Ranenh, mahaq broq ùh troq mòi, nà Ranenh raq, èh hadai i tòi tiah ca khoi broq ùh troq ðìq ðong. <sup>11</sup> Ma jah 'màng aih Boc Plình khoi doi: “Apaq broq tòi tango,”✧ èh hadai doi “apaq broq tòi jêh đac mangai.”✧ 'Màng aih tàng pì ùh i broq tòi tango, mahaq broq tòi jêh đac mangai, aih pì khoi broq ùh troq Ranenh.

<sup>12</sup> 'Màng aih pì khòh rabiaq trong biac broq wa bàu capoch, ma jah 'màng aih pì ep chiuq hadrah tiaq ranenh Chuaq, aih Ranenh 'ràng trùh ca pì biac ùh tawac ùh pakèh. <sup>13</sup> Mangai hadrah ma ùh loq xa-öch èh haq 'bìq hadrah ùh i can xa-öch leq. Can xa-öch jah ta'blêq ca biac hadrah.

---

✧ 2:8 2:8 Lêwì 19:18. ✧ 2:11 2:11 LEA 20:14; RAH 5:18. ✧ 2:11 2:11 LEA 20:13; RAH 5:17.

### *Manoh Lùi wa Biac Broq*

14 Ôi oh daq, tàng cabô doi dađeh i manoh lùì, mahaq ùh i ca biac broq lem, èh i lòiḡ cleḡ ùh? Manoh lùì 'màng aih i jah dèch mangai aih ùh?

15 Tàng i oh daq leḡ ùh i ca eo cwàn caxùnh, thiùḡ dahwèḡ caḡ, 16 wa i mòìḡ ngai ta pì doi ca wì haḡ: “Lam ma catèm beḡ, 'nhìa ma hatôḡ, caḡ ma panàc beḡ”, mahaq ùh am ca wì dahwèḡ cleḡ ma chac hamac nhet, èh i ca lòiḡ cleḡ? 17 Manoh lùì hadai 'màng aih. Tàng i manoh lùì mahaq ùh broq biac lem, èh manoh lùì 'màng aih bu dăng khoi cachìt.

18 Mahaq i 'nah ngai doi: “Ìh i manoh lùì, phàn au i biac broq lem.”

Ìh patô ca au manoh lùì da ìh ùh i ca biac broq lem beḡ, èh au patô ca ìh manoh lùì tiaḡ biac broq lem da au. 19 Ìh lùì i mòìḡ toḡ Boc Plình raḡ hêḡ. Ìh lùì aih joḡ. Can kiac Satan hadai lùì 'màng aih wa yùḡ tarìt.

20 Ô mangai blùng, ìh enh loḡ manoh lùì ùh i ca biac broq lem aih 'ngwan ùh? 21 Ap-ra-ham boc bèn, jò dèch am Isac con cla haḡ ta ca'bông tadreo, aih ma ùh nhò biac broq, Boc Plình jah doi haḡ ta-atoḡ 'mòh? 22 'Màng aih èh, pì hnoḡ manoh lùì pajùm ti biac broq da haḡ, wa nhò biac broq, manoh lùì jah gêh tòm. 23 'Màng aih jah broq xit Bàu Sech Hadròih: “Ap-ra-ham lùì Boc Plình, èh jah doi, haḡ mangai ta-atoḡ,”<sup>☆</sup> wa khoi jah doi haḡ bua da Boc Plình. 24 Nhò nen aih pì loḡ wì nhò biac broq lem jah doi ta-atoḡ, ùh xài toḡ manoh lùì hi hêḡ.

☆ 2:23 2:23 BB 15:6.

<sup>25</sup> Ji 'màng aih dìq, Rahap gu cadrì adroi nèh mangai tango yõc 'bac, cadoc baiq ngai lam rinh ngan trong, wa 'noh wa lam trong 'noiç, aih ma ùh nhò biac broq, jah doi haq ta-atoq 'mòh?  
<sup>26</sup> Chac hamac ùh i ca mahua yiang aih cachit, manoh lùì ùh i ca broq biac lem, hadai cachit 'màng aih.

### 3

#### *Khòh Padràng Rapet*

<sup>1</sup> Ôi oh daq, òi ta pì apaq i bàc ngai padèch dađeh yòng broq thài hnài, ma jah 'màng aih mangai broq thài hnài ep chiuq hadrah yi trap.

<sup>2</sup> Ma jah 'màng aih dìq đõng ca bèn broq tôiq xam bàc trong. Tàng i mangai leq ùh broq tôiq ta bàu capoch cla, aih mangai khi lem tôm gêh, nui padràng dìq dèh ca chac hamac cla.

<sup>3</sup> Bèn 'mùt khàp jang hacùng axêh waq ca haq dì tiaq, khi èh men jah wèq wech palaoq dìq ca chac haq. <sup>4</sup> Ngan 'bài bong beq: 'Nhac ca càn dàng leq, cayeo dèh 'nong lam ta leq, mòiq toq blênh 'yoh raq nui wech ta'mroq haq tiaq manoh mangai ma rùp wèq blênh wech. <sup>5</sup> Hadai 'màng aih, rapet 'nhac ca 'yoh, mahaq jah catèh biac càn. Ngan beq, 'nhac ca rôm càn dàng leq mahaq toq xit ùnh raq bùh cheo dìq. <sup>6</sup> Rapet hadai tìah ca ùnh; aih nòi apùq bàc tôiq ngang dù òi ta'ne 'bài phàn chac bèn, broq ùh hadròih dìq ca chac cla, bùh cheo ca 'nhòng mangai; cla rapet raq khi 'bìq 'bau ùnh bùh cheo.

<sup>7</sup> Dìq ca ngè rìh ta crõng taneh, 'bài chìm, ngè ma moq ti taneh, 'bài ngè òi ta diac raxìq dìq

jah con mangai padràng hnài thê wì haq iu tiaq. <sup>8</sup> Mahaq rapet, ùh i ca cabô jah padràng haq thê iu tiaq. Aih ngè dù, haq bình halùih can nóc ma broq cachit.

<sup>9</sup> Nhò rapet bèn jah manè padèch Chuaq, Baq bèn, èh hadai xam rapet bèn waiq hanip con mangai ma khoi jah broq tiaq dua 'mù Boc Plình. <sup>10</sup> Pajùm mòiq hacùng mahaq loh xam biac manè padèch wa waiq hanip! Ôi oh daq, ùh khòh broq 'màng aih. <sup>11</sup> Pajùm mòiq toq tamóc jah loh xam diac nhim wa diac xang 'mòh? <sup>12</sup> Ôi oh daq, long póc i loh plì ôliu loq long nho i loh plì póc ùh? Tamóc diac xang hadai ùh jah loh diac nhim hòm.

### *Khôn Rabiaq Enh Plình*

<sup>13</sup> Ta pì i ca mangai khôn rabiaq wa 'nì loq ùh? Nhò trong caq òi lem da cla, khòh pa'noh loh can khôn rabiaq nhò can habùat beq. <sup>14</sup> Mahaq tàng pì i biac tagrình git wa biac pagau pagùà ta manoh cla, èh apaq padèch dađeh, wa apaq capoch amòng tajraq hlài ca biac joq 'nàng. <sup>15</sup> Can khôn rabiaq aih ùh xài loh enh 'nhèq, mahaq loh enh cống taneh, enh chac xech wa enh can kiac dù. <sup>16</sup> Ma jah 'màng aih nòi leq i biac tagrình tagìq tagià, èh nòi aih toq i biac manhài wa rìm biac dù.

<sup>17</sup> Mahaq biac khôn rabiaq ma loh enh 'nhèq adroi đống lem hadròih, atìq hatroq, i manoh habùat, loq iu, bình halùih manoh loq xa-öch, loh plì lem, ùh i ca manoh loq gen can wa ùh i ca biac baiq manoh. <sup>18</sup> Mangai broq ca mangai



'noiç trah hatroq rai adrech can catèm, èh jah gich plì ta-atoq.

## 4

### *Apaq Tiaq Biac Crõng Taneh*

<sup>1</sup> Biac tarahen tagiç tagìa ta pì trùh enh leq? Ma ùh xài loh enh nòi ham enh 'nang tajêh ta'miaq ta phàn chac hamac cla pì raq 'mòh? <sup>2</sup> Pì ham enh mahaq ùh jah cleq. Pì jêh cađac mangai wa git 'bõn mahaq ùh jah cleq. Pì tajêh wa tarahen mahaq pì xôq ùh jah cleq taiq ùh waiç xìn. <sup>3</sup> Pì waiç xìn Boc Plình, mahaq ùh jah nhàn yõc cleq taiq waiç xìn ùh troq ðòiq toq broq bùi ta manoh ham enh cla.

<sup>4</sup> Ô! Mangai tango anang tau! Pì ma ùh loq, broq bua ti crõng taneh, aih tajraq hlài ca Boc Plình 'mòh? 'Màng aih mangai leq enh broq bua ca crõng taneh haq wìa mangai tagit ca Boc Plình. <sup>5</sup> Loq pì xoh bàu Sech Hadròih capoch 'ngwan 'mòh? "Yiang Hadròih ma òi ta manoh bèn loq waq ca bèn loh ca tarèh." <sup>6</sup> Mahaq Haq am ca bèn biac am dech bàc, taiq 'màng aih Haq ðoi:

"Boc Plình tajraq hlài ca mangai loq catèh, mahaq nhhu am biac am dech ca mangai loq paha'neq ðađeh."✧

<sup>7</sup> 'Màng aih iu tiaq bàu Boc Plình beq. Tajraq hlài ca can kiac Satan, èh haq wìa hangai ca pì. <sup>8</sup> Thia haten ca Boc Plình beq, Haq jah trùh haten ca pì. Ôi mangai i tòiç, 'nheo tì cla hreo beq, cabô i baiç manoh, broq hreo dèh manoh beq.

✧ 4:6 4:6 BR 3:34.

<sup>9</sup> Phai loq mango, ta-oih wa hmoi rayoih. Phai halìh enh do loh crò, halìh enh manoh bùi wìa mango. <sup>10</sup> Paha'neq dađeh jang ngìa Chuaq beq, èh Haq jah dèch pì tồc.

### *Apaq Hadrah ca Dabau*

<sup>11</sup> Ôi oh daq, apaq capoch 'mèq ca dabau. Cabô capoch 'mèq dèh oh daq cla, loq hadrah dèh oh daq cla, aih capoch 'mèq ca Ranenh wa hadrah Ranenh. Mahaq tàng ìh hadrah Ranenh, ìh ùh xài mangai broq tiaq Ranenh, mahaq mangai hadrah Ranenh. <sup>12</sup> Toq i mòiq Boc Plình hnhu am Ranenh wa hadrah, Haq dèch jah wa jêh đac jah. 'Màng aih, ìh cabô ma hùa hadrah mangai 'noiç?

<sup>13</sup> Ôi oh daq, pì doi: “Hì cô loq hì da èh bèn lam trùh ta phôq tau, ôi ta aih mòiq hanam, padro baxen ti chaq lòiq.” <sup>14</sup> Mahaq hì da èh loh 'màng leq, pì ùh jah loq! Ma jah 'màng aih can rìh da pì 'màng leq? Aih bu dàng hòi diac i mòiq rahyàc, hi khi èh hech đac. <sup>15</sup> Pagah pì khòh doi: “Tàng Chuaq enh, èh bèn rìh wa bèn jah broq bìac cô bìac tau.” <sup>16</sup> Mahaq pì khi yôc bàu catèh, èh padèch dađeh! Padèch dađeh 'màng aih ngang dù. <sup>17</sup> 'Màng aih, mangai loq broq bìac lem mahaq ùh broq, aih broq tòiç.

## 5

### *Bàu Pa'yèp ca Mangai Padrông*

<sup>1</sup> Ôi mangai can padrông! Hmoi rayoih, creocachech beq, taiç nen bìac nan xa khi padon trùh ca pì. <sup>2</sup> Cùng hang pì bùc hech, eo cwàn pì

catia caq. <sup>3</sup> Wang 'bac pì loh ca axiang, axiang aih teo òiòq kian pì, wa raliang cađac chac xech tiàh ca ùnh bùh cheo pì, ma jah 'màng aih pì khi gop haniùq òiòq cùng hang wang 'bac ta 'bài hi atiq lùch! <sup>4</sup> Joq 'nàng 'bac cùng baha mangai gat rùang pì, pì ma caq đống, haq creò hràng wa bàu creò da mangai gat khi trùh ti don Chuaq i cwiang itai. <sup>5</sup> Pì khi rìh ta crống taneh caq ôq bù da-òih wa pa'ngwan ca 'bac. Pì khi pabech dađeh tiàh pabech ngè trùh hi broq jam. <sup>6</sup> Pì khi ta'mòq tôiq wa jêh mangai ta-atoq, mahaq wì haq ùh tajraq hlài.

### *Khòh Chiuq Àt Jò Chiuq Jìq Xa*

<sup>7</sup> Ôi oh daq, 'màng aih khòh chiuq àt trùh jò Chuaq wìh hlài. Mangai abroq pìt 'mau gòm trùh jò 'mau loh plì ta rùang, yóc manoh chiuq àt trùh jò mè baxèm wa jò mè pulùch. <sup>8</sup> Pì hadai 'màng aih khòh chiuq àt wa cajap manoh, ma jah 'màng aih ten trùh jò Chuaq wìh hlài. <sup>9</sup> Ôi oh daq, apaq mamùc ca dabau, waq ca pì ùh hìaq 'bìq hadrah. Tau, Chuaq Hadrah 'nang yòng jang 'mang.

<sup>10</sup> Ôi oh daq, khòh tiaq dua biac chiuq xa wa chiuq àt da 'bài mangai capoch thai Boc Plình khi canòm ca hiniq Chuaq capoch. <sup>11</sup> Pì loq 'bài mangai i manoh chiuq àt, èh bèn doi i xôq ramöt. Pì khi tàng bàu anoi hlài biac chiuq àt da Jop, wa hnoq biac ma atiq lùch Chuaq am ca haq, ma jah 'màng aih Chuaq bình manoh tamèt wa loq xa-öch.

<sup>12</sup> Ôi oh daq, adroi đống ta rìm biac, apaq pachac, apaq patô plình, patô taneh, hadai apaq

patô ngè 'noiç èh pachac, mahaç joç, doi joç, ùh, èh doi ùh, waç ca ùh hiaç 'biç hadrah.

<sup>13</sup> Ta oh daç i ca mangai leç 'biç jùç jàm ùh? Waiç khàn beç. I cabô lem bùi ùh? Calêu manè Boc Plình beç. <sup>14</sup> Ta oh daç i cabô ùh hröc ùh? Creo ca 'bài craç broç gàu da Tagop Hadròih trùh ðòiç wì haç canòm ca hiniç Chuaç xùt dàu ca mangai ùh hröc, èh waiç khàn ca haç. <sup>15</sup> Bàu waiç khàn xam manoh lùì jah broç brêh ca mangai ùh hröc, Chuaç jah dèch mangai aih yòng. Tàng haç broç tôiç, hadai jah baxöng. <sup>16</sup> 'Màng aih pì pa'noh tôiç ca dabau wa waiç khàn ca dabau beç, ðòiç pì jah brêh ca ùh hröc. Mangai ta-atoç yöc manoh panim waiç khàn, joç 'nàng xit jua bàc.

<sup>17</sup> Êli hadai con mangai 'màng ca bèn. Haç waiç khàn xin apaç mè, èh ùh mè hloi piç hanam 'ne. <sup>18</sup> Khoi èh haç waiç khàn hlài, plình mè, taneh hon loh dahwèç caç.

<sup>19</sup> Ôi oh daç, ta pì i cabô lam ùh troç hangai ca bàu joç 'nàng, èh i mangai 'noiç broç haç tawìh hlài, <sup>20</sup> bèn phai loç, mangai broç ca mangai i tôiç tawìh hlài cađac trong ma ùh troç, aih jah dèch mahua yiang haç claih ca can cachit wa gláp đac bàc tôiç lòi mangai aih.

**Sech Hadròih**  
**Sech Hadròih**

copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo

All rights reserved.

2020-11-17

---

PDF generated using Haiola and XeLaTeX on 22 Feb 2024 from source  
files dated 29 Jan 2022

e5023a07-9831-5256-a315-1cae0f33043d